

Maombi ya Siri na Kujifunza Biblia

Kuomba kwake mwenye haki kwafaa sana, akiomba kwa bidii—Yakobo 5:16.

Kanisa la Mungu linaundwa na vyombo vikubwa na vidogo.... Hatarajii vyombo vidogo kubeba ujazo wa vyombo vikubwa. Anatarajia kutoka kwa mwanadamu kulingana na kile alichonacho, si kulingana na kile asichokuwa nacho. Fanya yote uwezavyo na Mungu atapokea juhudi zako. Yachukue majukumu yaliyowekwa karibu nawe na uyatimize kwa uaminifu na kazi yako itakubaliwa kikamilifu kwa Bwana. Usiyapuuze majukumu madogo yanayokusubiri kwa shauku ya kufanya jambo fulani kubwa.

Kuwa mwangalifu jinsi unavyopuuza maombi ya siri na kujifunza Neno la Mungu. Hizi ni silaha zako dhidi yake yeye ajitahidiye kuzuia mafanikio yako kuelekea mbinguni. Upuuzaji wa kwanza wa kuomba na kujifunza Biblia unarahisisha upuuzaji wa pili. Unapopinga kule kusihhi kwa Roho Mtakatifu mara ya kwanza unaandaa njia kwa ajili ya upingaji wa mara ya pili. Kwa kufanya hivyo moyo unafanywa kuwa mgumu na dhamiri kunyauka.

Kwa upande mwingine, kila upinzani dhidi ya majaribu hufanya upinzani wake kuwa rahisi. Kila kujikana nafsi hufanya kujikana nafsi kuwa rahisi. Kila ushindi unaopatikana huandaa njia kwa ajili ya ushindi mpya. Kila upinzani dhidi ya majaribu, kila kujikana nafsi, kila ushindi dhidi ya dhambi, ni mbegu inayootesywa hata uzima wa milele. Kila tendo lisilo la ubinafsi hutoa nguvu mpya kwa ajili ya kuthamini mambo ya kiroho. Hakuna mtu anayeweza kujaribu kuwa kama Yesu bila kukua zaidi kiadilifu na kuwa mkweli zaidi.

Bwana atakubali kila jitihada unayoifanya ili kufikia ukamilifu Wake kwa ajili yako. Pale unaposhindwa, hata unapodanganywa hata kufanya dhambi, usihisi kwamba huwezi kuomba, kwamba haustahili kuja mbele za Bwana. "Watoto wangu wadogo, nawaandikia haya ili kwamba msitende dhambi. Na kama mtu akitenda dhambi tunaye Mwombezi kwa Baba, Yesu Kristo mwenye haki." Kwa mikono iliyofunguliwa anasubiri kumpokea yule aliyepotea. Mwendee Yeye na umwambie makosa na kushindwa kwako kote. Mwombe akuimarisha kwa ajili ya juhudi mpya. Kamwe hatakuangusha, wala kuiangusha imani yako.

Maonjo yatakuja. Ndivyo Bwana anavyosugua mikwaruzo katika tabia yako. Usinung'unike. Unalifanya jaribu kuwa gumu kwa kulinung'unikia. Mheshimu Mungu kwa kulikubali kwa uchangamfu. Kwa subira stahimili maumivu. Hata kama umetendewa mabaya, tunza upendo wa Mungu moyoni mwako....

"Nguvu zako zitakuwa katika kutulia na kutumaini." Yesu anajua ukubwa wa jaribu lako na nguvu ya uwezo wako wa kushinda. Mkono Wake umenyooshwa daima kwa huruma na upendo kwa kila mtoto atesekaye. Kwa mtu aliyejaribiwa na kukatishwa tamaa Anasema, mwanangu niliyeteseka na kufa kwa ajili yako, je, waweza kunitumaini? "Na kadiri ya siku zako ndivyo zitakavyokuwa nguvu zako" (*Torati 33:25*) (*Youth's Instructor*, Juni 26, 1902).